

## Ata Nan ta Bezig Atrobe

Na 1995 Nashonnan Uní a tene su di kuater konferensia mundial di hende muhé na Beijing, China. Representantenan di nos islanan a forma parti di e 4969 delegado representando 189 pais, e 4020 persona na e Foro di Organisashonnan No-Gubernamental i e 3235 miembro di prensa.

Ma loke organisadónan di e konferensia a promové tabata ideologia di femenistanan radikal. **Tabata nan (ku nan agenda trosí) ku a skirbi e dokumento ku a sirbi komo base di diskushon.** Nèt nan...ku tin rabia riba e famia manera nos konos'é. Nèt nan...ku ta konsiderá matrimonio rais di tur problema ku hende muhé ta eksperensia. Nèt nan...ku ta konsiderá aborto un forma aseptabel pa plania famia i pues mester ta rekonosé komo un derechu humano na tur parti di mundu. Nèt nan...ku ta boga pa rekonosé sinku sekso (na lugá di dos): hòmber, muhé, homoseksual, lèsbian, i personanan transseksual (pa esnan ku a operá pa kambia di sekso). Nèt nan...ku ta konvensé ku un relashon lèsbian ta esun preferíbel pa hende muhé. Esaki ta loke Nashonnan Uní a promové na Beijing.

Maske hopi di nan ideanan a wòrdu rechasá, no pensa ku nan lo no purba imponé nan perspektiva irashonal riba mundu atrobe. Di bèrdad, durante e añanan despues di e konferensia, nan tabata bezig ketu bai. E siman aki mes no ta un eksepshon.

**E siman aki** (5-9 yüni) tin un konferensia na Nashonnan Uní (New York) entitulá Hende Muhé 2000 Seshon Spesial. Delegadonan na e konferensia (ku tambe ta konosí komo Beijing+5 [5 aña despues di e konferensia na Beijing]) lo evaluá e progreso desde e último konferensia. Sin duda e siman aki femenistanan radikal lo ta bezig atrobe purbando pa re-definí “famia” komo kualke union bou di un dak, promoviendo matrimonio homoseksual.

En realidat, Nashonnan Uní su Deklarashon Universal di Derechunan Humano di aña 1948 no ta harmonisá ku esaki. Entre otro, artíkulo 3 ta afirmá ku “tur hende tin e derechu di bida, libertat, i siguridat komo persona”. I e deklarashon ta klousurá bisando, “E famia ta e grupo natural i fundamental di e komunidad i ta meresé e protekshon di e komunidad i e estado.”

Ma Nashonnan Uní a pèrdè kaminda. Pa hopi aña kaba, nan prioridatnan ta mal bruhá. Un rapòrt resien di UNICEF (Fondo di Muchanan di Nashonnan Uní) a anunsia ku awendia mas ku mitar di e poblashon di por lo ménos 42 pais no tin fasilidat adekuá pa deshasí di awa di riol. I na 21 pais, mayoria habitante no tin awa limpi pa bebe. Segun e rapòrt, na vários pais ta mas fásil pa haña antikonseptivo ku awa limpi. Na China, por ehèmpel, 83 porshento di e poblashon por haña antikonseptivo, ma solamente 67% tin aksesu na awa limpi, i 24% ta deshasí di awa di riol na un manera seif. Refugiadonan ku a hui di Kosovo tambe a eksperensia e mentalidat aki. Nashonnan Uní a manda kondon, mientras nan tabatin mester di kuminda, awa, i bibienda.

Francisco Tatad, senadó na Filipinas, a akusá Nashonnan Uní: “E lucha kontra e enfermedatnan mas prevalente nunca ta haña tantu atenshon ku e lucha kontra embaraso.” Babette Francis, un suidadano di India ku ta enkabesá un organisashon pro-famia na Oustralia, a bisa ku e feministanan na Nashonnan Uní tin tendensia pa skual paisnan ku no ta legalisá aborto.

E perspektiva mal bruhá di femenistanan di Nashonnan Uní ta preokupante. **Nan ta kontradisí e étika di Beibel.** Palabra di Dios ta papia di hende asina, ku ta “...yama loke ta malu, bon, i loke ta bon, malu, loke ta skuridat, lus, i loke ta lus, skuridat, loke ta marga, dushi, i loke ta dushi, marga” (Isaias 5:20).

**Nos mester wak bon pa no firma ningun dokumento òf bai tras di ideologia tan bruhá.** I nos mester keda alerto ketu bai, pasobra ketu bai nan ta bezig promoviendo nan lokura.